

PERUTUSAN MENTERI

السلام عليكم ورحمة الله وبركاته

Assalamualaikum W.B.T dan Salam Malaysia MADANI.

Alhamdulillah, tiada ungkap selain syukur ke hadrat Allah SWT kerana dengan limpah kurnia-Nya, kita dapat bersama-sama menyaksikan keberhasilan dan merasai limpahan manfaat pencapaian yang diraih oleh kerajaan Malaysia MADANI sepanjang tahun 2024. Sebagai sebuah kementerian yang bertanggungjawab dalam memastikan perdagangan dalam negeri yang mampan, meningkatkan pendayaupayaan pengguna dan mendepani cabaran kos sara hidup, Kementerian Perdagangan Dalam Negeri dan Kos Sara Hidup (KPDN) telah memberikan komitmen yang tinggi dalam melaksanakan kefungsi yang telah diamanahkan bersandarkan kepada kerangka besar agenda Malaysia MADANI dan Kerangka Ekonomi MADANI.

Berkat kesungguhan dan kerjasama erat warga kerja KPDN, pelbagai inisiatif dan program yang dirancang bagi tahun 2024 telah berjaya dilaksanakan dan memberikan manfaat langsung kepada rakyat. Pencapaian-pencapaian yang terkandung dalam buku tahunan ini menjadi bukti kebersamaan pelbagai pemegang taruh sebagaimana yang selalu saya sebutkan sebagai K.I.T.A - (K) Agensi Kerajaan, (I) Pemain Industri, (T) Pematuhan Tatakelola, dan (A) Partisipasi Awam dalam merealisasikan fokus keutamaan KPDN.

Jika disoroti kembali, daripada sekian banyak pencapaian kita pada tahun 2024, beberapa kejayaan utama KPDN yang ingin saya ketengahkan bermula dari aspek ketangkasan penguatkuasaan. Melalui pelaksanaan OPS Tiris 3.0 sebanyak 43,444 pemeriksaan menghasilkan 2,738 kes dengan lebih RM91 juta nilai rampasan keseluruhan. Manakala OPS Kesan 2.0, sebanyak 3,765 notis dengan 80,390 premis diperiksa bagi mengekang tindakan mencatut oleh peniaga yang cuba mengambil kesempatan menaikkan harga barangan.

Pada masa yang sama, dalam memerangi perusahaan yang terlibat dengan perlakuan kartel dan monopoli bermasalah, KPDN bergerak aktif melalui Suruhanjaya Persaingan Malaysia (MyCC) dengan 99 syarikat telah dikenakan tindakan. Selain itu,

MyCC juga telah melaksanakan beberapa kajian melibatkan Kajian Industri Padi dan Beras, Kajian Menyemak Dakwaan Kartel Dalam Pasaran Makanan Berimport dan Kajian Impak Penguatkuasaan MyCC di bawah Akta Persaingan 2010.

Dalam aspek pemacu ekonomi domestik, sektor perdagangan runcit telah mencatatkan nilai jualan bermula Januari hingga November 2024 sebanyak RM1.614 trilion, peningkatan sebanyak 5.3% berbanding tempoh yang sama pada tahun 2023. Selain itu, sektor industri jualan langsung pula telah mencatatkan nilai jualan bagi tahun berakhir 2023 sebanyak RM34.4 bilion, iaitu peningkatan 7.4% berbanding RM32.04 bilion rekod sebelumnya. Agensi Perbadanan Harta Intelek Malaysia (MyIPO) turut memperlihat perkembangan positif dengan 51,591 pendaftaran harta intelek telah didaftarkan bersamaan peningkatan 14.4% berbanding tahun 2023. Suruhanjaya Syarikat Malaysia (SSM) juga berjaya melaksanakan beberapa pindaan perundangan melibatkan Akta Syarikat dan Akta Perkongsian Liabiliti terhad.

Dalam konteks mendepani cabaran kos sara hidup, pemberian subsidi bersasar memainkan peranan penting dalam memastikan bantuan sampai kepada golongan yang benar-benar memerlukan. Sebagai contoh, keberhasilan Sistem Kawalan Diesel Bersubsidi (SKDS) yang dilaksanakan oleh KPDN dalam mengawal peningkatan harga barangan di pasaran. Melalui SKDS, setakat 31 Disember 2024, sebanyak 110,533 *Fleet Card* diesel bersubsidi diberikan kepada syarikat pengangkutan darat barangan dan pengangkutan darat awam melibatkan 301,399 kenderaan yang layak.

Program Jualan RAHMAH MADANI (PJRM) sememangnya menjadi limpahan rahmat meringankan beban kewangan rakyat dalam membeli barangan keperluan harian. Tahun 2024 sahaja sebanyak 12,260 siri PJRM telah diadakan dengan jumlah kehadiran pengunjung mencatatkan seramai 12.5 juta orang. Kaedah PJRM juga telah ditambahbaik melalui pelaksanaan PJRM Musim Perayaan, PJRM@Pasar dan PJRM@Kampus.

Alhamdulillah, melihat kepada sambutan menggalakkan dan manfaat yang diperolehi daripada program ini, sebanyak RM300 juta diperuntukkan dalam Belanjawan 2025 untuk pelaksanaan Program Payung RAHMAH MADANI, peningkatan 100 juta berbanding peruntukan tahun 2024.

Walaupun, pelbagai kejayaan yang telah kita capai bagi tahun 2024, masih terdapat ruang penambahbaikan dan semestinya lebih banyak cabaran baharu yang mendatang di tahun 2025. Justeru, adalah menjadi komitmen kita sentiasa bersiap siaga dengan strategi dan pendekatan yang bertepatan dengan kehendak semasa dalam membantu mensejahterakan ekonomi rakyat dan negara.

Dalam kesempatan ini, saya ingin merakamkan setinggi-tinggi penghargaan dan syabas kepada seluruh warga kerja KPDN atas kejayaan-kejayaan yang telah kita capai sepanjang tahun 2024. Segala pencapaian ini mempunyai nilai dan makna, hasil daripada kerjasama serta komitmen tinggi yang ditunjukkan oleh setiap anggota Kementerian. Semoga penerbitan Laporan Tahunan KPDN 2024 dapat menjadi panduan yang berterusan untuk meningkatkan lagi penyampaian kualiti perkhidmatan yang kita berikan kepada rakyat.

Adalah penting untuk kita memastikan agenda dan inisiatif yang dilaksanakan oleh kerajaan bukan sahaja dapat didengari, tetapi juga dilihat dan dirasai oleh rakyat.

YB Datuk Armizan Mohd Ali

Menteri Perdagangan Dalam Negeri dan Kos Sara Hidup

